



04219

薛帷文鈔卷十二目錄

獻縣志畧序

勸修宋鄭介公祠序

代宗伯張葯齋夫子贈薛孝子序

盧氏族譜序

郭母陳太宜人壽序

蒼墩庵文祉序

鄭甫印譜序

季子墓碑考

國子監助教胡公丹中傳

同邑薛孝子傳



薛帷文鈔卷十二

武進 吳龍見

懋士
懋士

獻縣志畧序

志始於班掾蓋史體也古者列國皆有史自秦改置郡縣而郡縣之志由此昉矣昔司馬子長作史記以紀傳表分體別爲八書孟堅易書爲志後世因之以紀時政實兼傳表之體焉故自星野沿革以迄祥異物產之類莫不摯其綱領析其條目是史之所不及收者志則博稽而詳核之固政體之所繫也獻本州治前明洪武年間始改爲縣舊志不可考明萬歷乙酉張公汝蘊初輯

成編我

薛帷文鈔卷十二 序

一

朝康熙十二年癸丑劉公徵廉續修迄今七十有五年矣計七十餘年以來城郭之廢興河渠之遷徙戶口貢賦之增減俸工驛站之歸併裁復循吏名賢節義人文之後先媲美載筆闕如豈前此守土者乏史才歟將地處衝劇兼三長而未暇一爲論次歟抑爲政日淺有志焉而未之逮也龍見宰武一年調莅茲土下車伊始取舊志讀之慨然於所編之殘缺失次焉緣新任事案牘紛如差使絡繹未遑受簡歲閱兩朞諸務稍覺就緒爰與司諭鮑君梓等謀重修之哀集文冊廣詢故老蕪者刪之遺者補之舛僞者釐正之典則者附益之志仍八

卷之舊而事類則多所更定凡浹旬而草成雖未及斟酌完善而歷敘政治之張弛數十年事蹟靡不麤舉矣夫處衝劇而求閒暇不可得也於夙夜勤勵之中偶得寸晷展卷則亦可以集事方今

聖天子重道崇聖申命東巡獻邑地處至衝爲

鑾輿幸魯必經之地營盤道路橋梁郵舍亟需整飭自秋冬以來羽檄交馳冠蓋相屬於道是豈守土者握管時耶然知而弗爲爲而弗就脫遂巡數年一旦謝篆以去將貽終身之悔與曩者諸令君同類而共譏之也故寧使後之君子罪我志之弗備弗善而不欲使七十五年之綱紀經我而無傳則俗吏之責庶幾藉是而暫釋矣

薛維文鈔卷二序

二

乎屬稿既定質之鮑君司訓韓君璋暨鄉大夫士輩僉云君爲政二年於茲政平人孚毅然以修志自任其文則省於舊其事則增於前視張劉二賢尹何多讓焉龍見謝不敢當曰此特舉其畧耳他日者差務稍畢復加增訂以授剗劂氏可也且夫獻自賢王以來稽古好文毛貫之經術席穆之節義流風未墜代有傳人後之作者嗣是而潤飾之當不徒爲一邑之乘也郡存其槩省舉其要彙而上之以成

聖世一道同風之盛將志也而進乎史矣

勸修宋鄭介公祠序

代

吳龍見

江寧府西清涼山之麓舊有一拂祠祠宋參軍鄭介公
俠卽熙寧間監安上門繪流民圖入告者也公福清人
生平大節見宋史本傳及景定建康志公嘗從父宦白
下讀書清涼臺僧舍以故山有祠祠圯者數矣有明葉
臺山先生偕焦漪園諸前輩因舊祠而新之且爲之記
及祠錄蓋臺山與公同里故表章之不遺餘力云我

國家定鼎改元百餘年來祠宇傾仆父老過其下者咸
低徊感歎於是吾友武進明府郭君鑑堂景介公之流
風企臺山之高義慨然以興復倡同志且乞余言以告
閩中士大夫余嘗讀西塘文集竊謂天地貞元之氣人

薛帷文鈔卷三

序

三

得之以生其浩然者激而爲忠節燦然者發而爲文章
二者千古之能事也公之奏議剴切詳明詩文藏天祿
石渠間北宋之焯焯可傳者至其爲民請命觸禁行權
天澤倘後於一旬頭顱請懸於雙闕何其壯也文章忠
節公殆兼之矣抑又思當日之能文者王介甫而下如
章子厚呂平甫輩皆有才名使其集至今存將人人唾
而棄之公以一監門之賤斷簡殘編造物若重有惜焉
五六百年來士君子爭盡讀之以爲快則豈非文章之
重尤重以忠節也哉且公福清人鄉先生沒業祭之於
其社矣乃金陵以讀書片席之地猶相與崇奉之椽栌
几筵將竝鍾阜以俱隆與淮水而俱長也而以視夫半

山之捨宅爲寺者何啻霧散煙消於頃刻間乎盛衰之
理修短之數其亦較然可觀已公之再斥英再移泉也
雖以元祐諸名卿爲之推轂而卒坎壈以終罷官之日
惟餘一拂至今稱一拂先生祠雖經易名而舊號相仍
未之有改也余家桐山去秣陵不遠宋元明三朝名公
傑士所爲詩歌傳志謚議及上梁文殆耳熟焉爰不辭
而爲之序若夫縉紳士子慕義無窮廟貌改觀建立彌
廣垂之久遠此則郭君之志而臺山先生同里表章之
遺緒其亦有所藉以不墜也夫

代宗伯張葑齋夫子贈薛孝子序 吳龍見

憲皇帝御極之元年舉孝行七年余督學江蘇毘陵郡守魏君晉陵令任君以孝子薛有年應

詔大府彙核題請十年十月奉

旨旌門於是毘陵士大夫各撰次行狀傳贊序頌暨詩文彙爲一冊介門下士吳某而請序於余曰孝爲子職之常而百行莫之或先孝蓋難言矣顧自生初以迄終天隨分養志必求所以自盡而又惴惴焉不欲令人知者其庶幾乎按薛孝子之事父晉申也似無奇節可稱述迺其苦身戮力左右承歡至胝目而目復明顛天而天輒應孝思所感則豈非至庸而至奇者歟身歿數年一

薛帷文卷十二 序

五

巨荷

旌典顯榮赫奕在人耳目間迴念曩者晨夕憂勞孺慕之誠終身不改何嘗一計及此抑余讀前輩唐凝庵常州府志吳嚴所毘陵人品記竊歎毘陵孝行焯焯可紀者未易更僕數孝子之行狀與明孫慶之吮瘍愈母段鏞之吮疽眦目秦旦秦奭之坎胸眦創事絕相類且與明吳運之告天雨冰宋陳思道之廬墓悲慟何不謀而合也是數子者或旌或否豈非孝子之有幸有不幸歟今薛孝子遭逢

聖明建坊旌表而同鄉士夫又爲傳誌歌詩以褒美而光大之其亦可以不憾矣夫敦倫教孝以敷揚我

朝孝治天下之至意學使者之任也余不敏久蒞學政
思有以風勵三吳人士而又得備悉孝子之行實於同
邑吳生之口述爰不辭而序之

盧氏族譜序

吳龍見

嘗考周官太宰繫民九兩參以司徒安民六俗所稱族墳墓聯兄弟者統之以宗使自相聯屬卽先王以族教安之義靡不舉矣譜系之作源於世本魏晉以降世本不傳獨氏族志存耳顧氏族之紊大率援引往牒源遠而支分分者又強合之爲世系爲世表海內族望其可徵信者幾何盧望范陽本齊太公後傳至奚食采於盧因以爲氏當宋高宗時有蕙江侯某者扈蹕南遷受封餘姚盧之盛自姚江始其子姓僑居浙西江左暨燕京者姚江分派也舊譜繁舛難稽裔孫某特仿歐陽氏蘇氏譜法詳列世次有倫有要其遠宗及他徙未能詳者

薛帷文鈔卷十二

序

七

寧闕而不書氏族之可徵信者殆庶幾焉余因慨譜牒之脩繫於宗族者大也宗尊也爲先祖主所以紀理族人也族湊也聚也謂恩愛相流湊也大宗率小宗小宗率羣弟俾生相親愛死相哀痛未有不由本支之秩如者也余聞某君慷慨有志行輯譜而論著之且請序於余殆有感於

今天子敬宗收族之治歟將古者小史奠繫世族詩書孝弟姻睦之遺猶然未墜而吾鄉士大夫其亦可以取則也夫書以爲序

郭母陳太宜人壽序代

吳龍見

封宜人郭母陳太君廷慶州牧勁草先生德配邑侯鑑堂父臺先生之賢母也歲三月下浣邑侯覽揆之辰南蘭士大夫將登堂介壽侯堅辭不允不得已請於四月十一日爲太宜人稱具慶侯乃具道吾母春秋高雞豚不腆無以承笑顏膝下得諸先生瑤篇錦字祝吾母且遙侑吾父觴敢不拜嘉於是羣情歡洽爭先獻所以壽賢母者而屬序於余昔者夫子論詩以關雎鵲巢爲風始先儒劉向匡衡勸戒於後世其於匹配之際生民之始可謂詳且切矣關雎之德徵於麟趾而其化極于兎且鵲巢之德徵于采蘋而其化極于羔羊至今讀之恍

薛惟文鈔卷二 序

八

然見成周盛時風俗茂美賢才衆多在位節儉正直其原實起於房中而劉向論次列女傳與洪範五行陰陽徵應相表裏此其義至深遠也太宜人系出閩之福清望族爲陝西考城明府媿六公女幼嫻姆教紉組豆觴靡不精詳腆潔于歸汾陽後逮事本生姑以孝聞相夫鞠子佐理陰教庶幾閨門友樂之情焉太翁有四方志歷遊秦豫燕吳間旋上京師由廷銓任直隸延慶牧太宜人則奉姑就我侯祿養於真州及暨陽數十年如一曰仰體太翁俯育我侯斯鵲巢之夫人起家而居有之者矣先是太翁宦遊太宜人課子維嚴侯稟承之學業大進蚤歲食餼上庠名噪士林旋以明經秉鐸興平歷

任江左服官所至著聲績有羔羊節儉正直之風其於國家爲干城腹心則又非中林武夫之可比此皆太宜人教也至於秉性慈和綿嗣續廣鞠育二公子英英露爽頭角嶄然視穆螽之德何多讓焉方今

聖天子壽考作人肅肅雖離自家推國關雎之化行而洪範五行之論寢而不作此慶雲醴泉嘉禾瑞蘭之所自來也太宜人躬有鵲巢之德教其子爲羔羊素絲之臣可不謂人瑞乎哉由此言之

興朝雲物之瑞雖多曾不如汾陽之門令妻壽母考鐘而伐鼓者庶徵尤足嘉也且余聞太翁侯銓日下重荷國恩行見奮建同朝平賢繼美太宜人河山象服紫誥鸞章後先輝映其福履又曷可量哉茲值清和令月當設悅之辰麥秀兩岐花開滿縣我侯孝思肫切借諸昆季族屬戚畹朋從率毘陵官僚紳士稱觴上壽綵服華筵雲璈錦瑟爵弁珠履鳳起蛟騰咸歌南陔華黍之章而余竊考匡劉論奏風化之義知麻嘉之應斷在今日且爲之溯源於二南也

聖朝之符瑞夫豈人世吉祥善事所得擬其萬一乎用書此以質我侯并郵寄太翁先生庶開顏撫掌滿引一觥

云爾

江陰城西三十里曰申浦延陵君子之墓在焉又西迤北十里曰蒼墩相傳五代時蒼梧王葬其下塚不可攷碑碣無存惟崇岡繚繞竹木鬱鬱明季僧某始結茆龕近稍拓地成小庵云嗚呼自五季迄今未及千年而蒼梧王譜牒莫詳邱隴莫識昔日之玉魚金盃忽化而爲蔓草荒煙矣空江杳冥天風蕭颯惟聽牧豎謳吟與梵唱之聲相應和抑亦感慨之所由集也延州來季子去五代逾遠顧讓王高義在人耳目至今豐碑十字赫赫與日月爭光豈非龍門所稱得夫子而名益彰者乎余悲夫蒼梧貴盛不亞春申而珠履珠襦同其零落也將

其人本無足傳與抑不獲賢者爲之表其墓與所可幸者邑志未湮又得之於故老傳聞則與夫目前之高塚纍纍旦暮歇絕者不可同年而語矣程子浴與繆子澗輝及同社友集庵下余亦赴焉余將有遠行正昌黎所云出門惘惘者未暇治舉業也因坐觀戰藝命酒三爵進諸同人而質之曰時文祇小技苟有志於不朽者當與道古毋沿洞於今學而不知止同人或哂余噫嘻丈夫年逾強仕德與功皆無足稱述所立者言耳而言之無文庸詎知其果行世而傳遠不與夫悠悠者同盡乎於是粥鼓初歇松風颯然夕陽下秦望諸峯客影散亂余與程子東行至季墓碑前而申浦之潮適至

嘗考黃帝史蒼頡通於神明仰觀奎星圓曲之勢俯察
龜文鳥跡之象博採衆美合而爲字是曰古文科斗書
卽古文別名蒼頡古文之祖也至周宣王太史史籀始
作大篆篆者傳也謂傳其物理施之無窮漢書藝文志
云史籀十五篇是也厥後秦相李斯小篆兼採其意而
增損之亦曰秦篆凡銘題鐘鼎及作符印用之王次仲
作八分書程邈復作隸書漢以後皆用之按八分卽小
篆之捷隸又八分之捷也後人刻爲圖章則又採屋漏
折釵鐵線諸文而兼擅所長以著一時而鳴得意焉余
自束髮受書習舉子業兼詩古文詞於一切技藝之末

都不暇爲然每遇秦碑漢碣玉血銅班螭紐龍文世人
所珍同荆璧者未嘗不留意焉蓋悼古學之失傳慨斯
文之屢變魯魚帝虎之訛其所由來者漸也間一爲之
正其點畫辨其音聲以質當代博物諸君子至於圖章
之作代有傳人都未暇計其工拙何如也予甥鄭甫仲
山少孤力學弱冠爲文章多未經人道語予心竊喜之
旣乃苦家貧餬口大江南北見古人法書名畫好臨摹
之皆絕肖又兼倣秦漢篆刻以自娛余病其愛博不專
輒誡之曰勿爲無益藝雖工弗貴也近廼於獻陽官舍
案頭見其所爲印譜裝潢成冊於古人篆法備工諸體
能得其神而非僅蹈襲其迹者又幸其巧智之施旁及

他藝而迄有所成就也吾鄉盛孝廉大典旣爲之序其
畧矣余復書數行弁諸簡端非遂褒其可褒也念甥之
志乎古而能進於其大者遠者焉則幾矣

薛帷文鈔卷二 序

季子墓碑考

吳龍見

距江陰城西三十里有港曰春申延陵季子之墓在焉
墓有碑高可丈許廣半之文曰嗚呼有吳延陵君子之
墓蓋宣聖筆也歐陽永叔據太史公書謂孔子生平未
嘗至吳不得親表季子之墓遂使好古之士往往疑之
雖然孔子之於季子相契以心相尚以德跡其葬子嬴
博猶往而觀禮焉安知不一登其墓而弔之哉且孔子
有表季之心卽未嘗身履其地無不可者考越絕書越
王勾踐躬求賢聖孔門弟子奉先王雅琴治禮奏之則
吳會之往還數矣卽如言子吳人也聖道日南獨不可
挾與俱來乎而謂必身至而銘之者何其固也孔子之

薛惟文鈔卷三

考

三

篆其見於古法書者大不逾寸而茲碑字體徑尺似有
可疑豈開元間鉉宗勅殷仲容摹勒或擴而大之歟抑
重刻於宋之崇寧知軍朱彥更有甚焉者歟杜佑辨古
延陵地非曲阿而是晉陵其說最詳則碑之刻於常與
刻於潤者其真贋益判然矣朱公彥都公穆竝好古士
也彥先表墓禁樵採而穆復敘其本末作碑考可謂有
心維持風教者君子之墓聖人之書百世而下雖與日
月爭光可也有明之季相傳碑踣於雷火裂爲三土人
扶而植之百餘年間裂痕復合石光晶瑩照人購榻者
彌衆想神物之在宇宙固歷劫而不可磨滅者耶曩時

聖祖仁皇帝南巡從前學使者請

御書匾曰讓德光前則又與宣聖之碑竝傳不朽矣

碑碣文鈔卷十二考

十四

國子監助教胡公丹中傳

吳龍見

公諱夢熊字丹中號璜川陽湖人前明尙書忠安公澁之裔孫也考權邑諸生績學攻文試不售館彭城病沒是時公年弱冠拮据治喪竭情盡慎里黨咸以孝稱公家故貧遭太翁喪乃益落服闋走彭城課徒隙以自肄公幼本庭訓及長遊學四方遇良師友相質難虛衷研慮久之自得然後已故工制舉業兼通詩古文詞悉有法度可觀年二十九入都粵撫安公圖時爲諸生敬事公延致家塾者二年旋就天津商籍試受知於督學梅月川先生連入北闈下第至康熙甲午始以戴記獲魁時余族兄旭亦以麟經入設南北闈名次俱第五吾鄉稱異數云尋改原籍七試春官揀選需次而公年已近六旬矣青陽宗伯吳七雲先生知公品端學邃循例保舉雍正某年授國子監助教大司成以下暨滿漢同官無不傾心諸生肄業赴考者人人悅服公前後在職凡十有餘年遇

覃恩受封嗚呼士未遇時受徒牖下矻矻窮年若將終老焉一旦名公卿論薦

聖

天子拔擢儔類之中依輦轂入成均時闡儒先義蘊開示後學殷勤指畫歷十有餘年雖不得陪文學侍從之班然以視白首研經淪落不偶者何如也公緣病給假安粵撫適任楚藩迎養二載安公義敦賓師可以風勵

末俗而公之教思其感人者抑何深歟歸里後建祠收
族哀集所著四書尙書禮記文共若干義詩三卷古文
駢禮雜著三卷待梓并自序始末於乾隆辛酉某月日
卒距康熙辛亥某月日壽七十有一配曹孺人後公不
及二旬亦卒逾年其子暨堂哭持公所撰自序來乞予
文予與公同里知公頗悉故不辭而爲之傳

論曰余官戶曹時往來國學修道堂見公丹鉛經史寒
暑不輟諸生晉謁之暇卽鍵關著書泊如也公殆篤學
嗜古人歟憶乙卯歲有同鄉徐生直名赴試文到監距
場期僅三四日公立趣駕請大司成補錄得送京兆入
闈公之援引後進類如此

同邑薛孝子傳

吳龍見

薛孝子陽生者名有年常之武進人也孝子之父晉申年五十生孝子家貧而好施常苦不給孝子甫就塾卽慨然曰吾當成父志旣冠力田治生蠶給餽粥有從弟某孤弱不能自存孝子勉爲完配且置產以贍之族黨間有匱乏者父所欲周卹靡不遂也父嘗病目幾喪明孝子走數十里外延醫嘗百藥不効迺子夜跪而舐之久之翳盡得復見天日父又遭棄疾勺水不入口三晝夜孝子焚香籲天願以身代父夢神降稱巫咸曰汝子孝上帝許活汝矣驚呼家人進粥噉之盡二孟明日病良已強飯徐步優遊里閭以樂餘年孝子時屬親朋具

酒餽閒進博奕諸戲具逋錢纍纍稱貸以償父不之知也日奉杖頭取適以爲常父壽七十八而終孝子慟絕復甦者再已而力營葬事葬畢廬墓下天寒月黑悲風蕭颯孝子拊膺夜哭與嗥狐啼猿相應和如是者三年其後遭母喪孝子痛母如父目失明耳失聰血枯骨立見之者以爲人腊也積哀成疾疾亟口念父母不置嗚咽而卒時方盛暑越宿乃斂顏色不變如生時年五十有五原配魏氏繼室周氏子男四人謙泰豐恒薛氏家廟廢孝子卜南河地建焉犇牛鎮橋圯孝子設義渡以濟至今賴之凡其父平生所欲爲者必成而有終如此孝子之卒也學校自上其事所司咸異之聞於

朝特舉旌門之典於是孝子嗣君豐以徐庶常景曾行狀
來屬傳於余余謂孝子立品卓卓自爲不朽寧以文重
耶且吾鄉薦紳先生高銜大章足行世而傳後非余之
所敢任也雖然人以文傳文亦以人傳昔虞山錢宗伯
謙益傳雷孝子刲臂療父疾輟轉以不及旌爲憾余謂
雷不及旌得虞山傳之必傳於後無疑矣今孝子旣荷
旌典褒大顯榮爲之文者雖非虞山尙亦可附以傳歟
余少孤奉母母氏有羸老之疾貧無以養又將饑驅於
四方感孝子之事狀真然不知涕之流落也迺不辭而
傳之

薛帷文鈔卷十三目錄

重修武強縣城垣并濬外池碑記

滹川書院碑記

重修武強縣南關玉皇閣碑記

重修漢河間獻王陵寢碑記

重修獻縣城隍廟碑記

重建馮家橋碑記

重修獻縣文廟兩廡戟門櫺星門記

擬紫陽書院記

薛帷文鈔卷十三

武進 吳龍見 恂士一字惺士

重修武強縣城垣井濬外池碑記

武強古武遂也城凡三徙周顯德間始築今治屢毀於兵明英宗時復築又圯於水成化間邑令吳鳳鳴展築規制麤備延及我

朝歷經補葺而歲月滋深殘缺不治

國家承平日久海宇輯寧

皇上勵精圖治安不怠危近緣畿輔偏災用寓賑於工之

策凡直屬郡邑城垣次第興築而武強列要工焉余受

薛帷文鈔卷十三 碑

一

篆次日周覽城池見垣墉頽落門關不具人畜闖入池則四面皆平居民播種秋麥溝與塍等乙丑二月上旬始購選木植灰石磚葺等料勿惜重價勿憚遠涉所需器物織悉畢具召諸匠役環集城下擇日興工余親加指畫一一用命百姓踴躍趨事日以千計無敢惰者初清城根築基而城頂善崩嘗一日壓數十人於其下皆自土中出有兩人最後出幾斃余亟治之數日後幸復來供役又苦無水掘井至四五尺卽遇沙土井壁不立余命用葦盤下極深甃磚而上得水不竭城內外凡掘井二十有四舊井鹹苦迺於南城內外及西城內三井得甘泉民間賴之四門舊有月城料估不及應撤去余

以重門禦暴體制攸關爰加意節省經費七百餘金增築月城不足則捐養廉四百金以成之存舊制也城東南隅有奎光閣半圯又因版築其下振動將傾余念閣在學宮之異位亟扶正而葺新之按武遂福小土或讎薄不毛又值頻年旱災民多流亾聞築城興役牽率來歸有包攬冒帑者余察其姦狀斥逐之不遺餘力也於是按日給錢必躬必親絕不假手吏胥無錙銖扣尅弊用其力而厚其備養其身以恤其家饑黎日有起色矣當是時丁壯赴工老弱饋食余不乘不蓋雲梯下上戴笠披褐不遑飲食以董率而勸相之久之民與余習用命益勤甫歷三時土牛四起雉堞皆興重門洞達樓觀

巍然尅期告成若有神助焉然余自春徂夏自夏徂秋淒風苦雨烈日嚴霜靡不備嘗故工旣訖功不覺面如墨而鬢添絲也城周圍四里一百五十六步土高一丈八尺磚堦高六尺城基濶二丈四尺頂濶一丈二尺角墩四座腰墩八座門樓四座東曰迎旭西曰西成北曰迎恩南曰永固女牆更鋪水道馬道築治均如式凡用帑金二萬二千三百兩有奇經大憲題達內部核銷余自武調獻後迴念城高而池未深制猶未備丁卯三月復捐金濬池濶一丈深八尺周圍視城丈尺加廣以利蓄洩以備不虞於是武遂金湯之固甲於畿南諸邑矣抑余更有進焉城者盛也所以盛受民物也今城則高

矣池則深矣民物則未見豐阜也倘亦災祲之後元氣未復歟易曰王公設險以守其國左傳子服景伯曰民保於城城保於德

朝廷前此發帑賑饑全活無算今又寓賑於工惠我武民後之君子職司民牧幸際昇平以撫字爲先而加之教育既富以強用文哉武俾衆志成城則保障之雄又不徒在高高下下間也同城監工者司諭張君本司訓

劉君譽典史高國瑞例得附書

附重修武強縣城垣碑記

編修劉自潔人武強

邑之有城以衛國也城在近畿乃重鎮也而能以工代賑公私兩利尤策之善者然奉行不善則亦足以叢姦此牧民所以急良吏也武強彈丸地而清漳滹沱環帶左右元明以來遂爲畿南屏障城凡三徙周顯德中始築今治久而漸隳至明英宗築之成化間

薛性文鈔卷十三 碑

三

又展築焉厥後歲月侵尋風雨漂蝕我朝太平日久衆心成城故未皇此今

天子軫念民艱不惜金錢千百萬因而敕修直隸城垣寓賑於役而我武之役以興維時戶曹

吳公來尹是邦實主斯役公仁心爲質而綜理尤精計工賦直一以實放毫不假手胥吏而無月蓋與不

版築同雖估價未及能曲爲籌畫不足則捐養廉數百金以助之重門突起樓櫓赫然大壯郊畿色矣以其

餘力竝完東南隅之奎閣爲振興文教基也規撫亦遠矣哉昔者杞之城而山甫築齊召伯營謝詩人歌

譏輕用民力故也然而山甫築齊召伯營謝詩人歌之以爲美談豈非董率得人故能愛以忘勞耶况今

之城築與古異古用差役財聚於上今用雇役財散於下又得賢司牧撫循而宣播之國之固也民之福

也繫成之賜也是役也經始於乙丑仲春以其年九月落成維時董其成者州刺史姜公東毓分任其事

者司諭張君本司訓劉君譽暨邑尉高君國瑞而公之甥庠士邵豫公之子國學生端猷實左右之公江

南武進人名龍見字恂士一字薛帷以博學宏詞徵就舉京兆丙辰遂成進士

嘗主司農政而改今官

武強地瘠以貧邑小而僻甲子冬余始下車謁學宮棟宇半傾繚垣不具廣文先生至僦屋以居求所謂書院義學者無有也乙丑二月興修城垣度材鳩工親率版築寒暑閱間九閱月而工幸告成城中有劉公祠祀劉令朝宗順治年間守城禦賊有功肖像於其中余往視焉見土屋三間頽圯將盡劉公座傍草土什物壅積皆滿庭中雜設酒甕碾磨諸器具人畜雜沓糞壤狼籍余怪而問之則邑有亾賴生韓甲恃刀筆爲業其子釀酒安碾竊據其中者蓋五六十餘年矣前此有黃令某力欲驅逐復祠申學使者得報可韓乃持黃陰事牴牾久之

黃旋去任不果行余立召韓父子諭以賢侯祠宇不宜作踐亟避去姑予十日限韓始有難色繼以余言故越九日他徙庭宇乃空城工竣後餘木石物料亟興工修文廟兩廡及崇聖祠明倫堂土垣易磚規模麤具方謀卽劉公祠建書院廼未及經始而余奉檄調獻陵以丙寅新正之五日謝武篆去旣去念舊治相距僅六十里有志創建而以去任輟可乎仍命舊吏役董事搆面東堂三間門房五間匾曰淳川書院而劉公祠像亦葺治之題賢侯劉公祠不敢廢云是役也凡用工料錢十二萬五千三百有奇皆余捐俸爲之又因書院未就先假他所設義塾延師課邑中子弟給修脯焉成余志也余

以保固城垣故三年之內例得躬往相視於是邑中縉紳先生率諸耆老士民等設酒肴奉匾額羅拜庭中余謝不敢當且進諸士民而告之曰武強比他縣雖小然名公鉅卿代有聞人膠庠多士人文蔚起視通都大邑何多讓焉惜余爲役之日淺凡所願舉而未逮者指不勝屈也卽如書院義學余草創於前章程未立後之君子倘能踵事而光大之儲英育材文章事業其曷可量乎余培城濬池倦倦舊治獻陵又擊柝相聞他日者人心風俗蒸蒸日上敬拭目俟之矣

重修武強縣南關玉皇閣碑記

吳龍見

距武遂城南門百餘步有玉皇閣不知創自何代順治十一年諸生韓從相重修至乾隆四年間大雨閣圯於是城內外士民范雲龍等倡捐重建於十年五月落成余適於九年十一月出宰茲邑邑人以閣記請蓋余莅茲土未數月也卽奉

命修治城垣自春徂夏鳩工庀材董率版築日不暇給如學舍之宜新壇社之宜整河隄溝渠之宜防宜濬均未遑兼及而玉皇閣先藉衆力巍煥城南斯我邑之義舉也夫閣建邑南於城有重關之固其下通往來行旅時得休憩制莫善焉創始何代旣不可考今壞而復修

薛惟文鈔卷十三 碑

六

高敞完固并建石梁於閣之西南以通輿馬脫遇水潦民不病涉其利益吾民甚大固非敢褻明祀誇美觀也且武遂曩被旱災民多流亾去歲始獲有秋稍稍復業而士民之樂事勸功已如此自今伊始年豐人和長受明昭之賜百廢具舉其可量乎抑余聞之玉皇尊無二上萬國之所瞻仰也偏隅下邑建閣崇奉毋乃近僭然揆之日監在茲與視聽自民之義或不甚謬戾且記不云有其舉之莫敢廢乎然則是閣也當與重城竝峙千古余益幸吾民之踴躍忘勞而樂觀厥成也爰不辭而爲之記

重修漢河間獻王陵寢碑記

吳龍見

獻邑得名自漢河間獻王始王諱德景帝子孝景前二年封河間國王好儒術求遺書得周官尙書毛氏詩左氏春秋一時儒者多從之遊武帝時獻雅樂對三雍宮事詳班史傳贊及宋儒司馬溫公贊中迄於今言六藝者靡不頌王之功也當是時列國諸侯王僭侈所招士率多浮辨甚或哀聚姦猾悖逆妄圖獨王恂恂被服禮樂造次必於儒者王之功懋矣德亦未有高焉者也考王世次去秦醜未遠挾書之律雖除而聖澤已就湮矣假令天不篤生賢王則六籍之廢墜者誰爲蒐採三禮之殘缺者誰與表章乎昔孟子歷敘道統至於孔子慨

然以見知自任而遙遙焉俟五百年後之間知設計其時以聞知屬王度王未必受然王實倡率漢庭諸儒爲訓詁爲箋傳闡經翼聖以迄隋唐五季卒授不傳之緒於宋五子焉王之功德巍巍乎其不可尙已考王陵在獻邑東十里歲久漸平寢殿三間頽落將盡繚垣不具碑碣斷仆二仲享祀宰弗躬親龍見始謁陵下廼於荆棘間行禮懼無以揭虔而妥靈也乃謀於邑紳紀君容雅等各捐俸資重建寢殿三間中奉獻王神位東西奉毛公貫公兩博士配享殿門一間門左右室二間四周繚以磚垣階級甬道一一修治如式塚則培土而高大之雜植栢槐榆柳二百餘株擇劉氏子爲奉祀生盧某

守祠凡陵旁地畝屬盧種藝以供終歲灑掃及添植樹木灌溉之資申請學使者皆報可於是直隸方伯方公問亭觀察辰公天津憲副陳公學田過獻咸具牲醴展謁焉蓋獻王功德在聖門傳之無窮是以越數千年而如一日也龍見曩爲諸生二十年幸以經學通籍出宰是邦念王上紹鄒魯下啟洛閩瞻園陵而不改肅廟貌以如新庶幾藉春秋蘋藻一致嚮往之微忱云爾

重修獻縣城隍廟碑記

吳龍見

今天下郡邑通祀城隍仍各廟於其地制也城隍秩崇
五等祀舉二仲壇廟有饗保境佑民靈應切近與守宰
職掌相埒故氣足以相感凡膺牧民之任者無不肅將
廟祀以治民事神理原一貫也獻邑城隍廟在縣治西
偏始建未詳自明成化以迄末季重修者五邑志廟碑
可考

國朝以來何年繕葺未見載紀相傳前任楊君希魯曾
加飭治距今四十餘年風雨剝蝕廟廡傾頽象設漶漫
甚非所以妥侑明神歲丙寅孟春余自武強調茲邑謁
拜瞻視踧踖弗寧奈甫經受事諸務坌集又檄奉差委

薛帷文鈔卷十三 碑

九

行役於外是以有願未酬丁卯歲公務稍覺就緒遂銳
意興修首捐俸金購物料紳士商民亦各競勸樂輸庀
材諏日維時春夏之交雨澤未降余於鳩工之始齋戒
薰沐偕司諭鮑君梓等虔禱於神爲民請命方懼區區
寸誠不足感格神明乃日晡而雨大作以次甘霖疊沛
四野普霑二麥秀穎秋禾徧佈闔邑歡呼相慶至稱余
輩以誠能昭格余輩謝弗敢居然神之眷佑下民籲上
蒼而降之康其靈爽誠赫赫矣夫神之陟降初不繫乎
廟之廢興顧衆志成孚廟貌式煥神實鑒之自今以往
願我闔邑有衆永念天庥自求多福四民各安其業無
作慝以爲神羞將時雨時暘長受昭明之賜余輩藉手

以薦馨香而神庶幾其弗吐也書不云乎惠迪吉作善
降之百祥聖經垂訓炳若日星是余之所以勗爾邑衆
者豈釋道家談報應比歟是舉也始於乾隆十二年某
月某日竣於某月某日一應工料共用金貳百餘兩董
役諸生及捐貲職銜姓名例得并書而勒諸石

重建馮家橋碑記

吳龍見

獻邑所治南自富莊驛入廣濟門出拱極門至商家林迤北凡七十里爲自江浙山左至京師之孔道差使絡繹仕宦商賈往來不絕其間道路橋梁飭治與否惟守土者是問商家林南十五里有古河溝迺迤西饒陽武強兩邑瀝水所灌輸由大道傍東西兩溝宣洩經商家林北流入河間而跨其上以通南北者則曰馮家橋云今歲正月余自武強調獻由府上省每從橋西遠道而北竊怪不由橋上行蓋橋之將圯也久矣四月橋北堞壞南堞半傾不立余往視之橋兩堞幾磚石水門凡五梁柱皆大木覆以厚板高二丈七尺寬二丈五尺長七

薛惟文鈔卷三 碑

十一

丈二尺年久不治板木皆朽腐撓折不任車馬非撤而新之不可吏曰工大費繁例申上憲俟估計請帑余卽日命購料興工選材必精無惜重價鳩工必良給值從厚爰晝夜董率寢食其下工役踴躍將事克勤閱十有五日落成高廣堅厚其尺寸視舊殆有過之無不及者計用錢二十二萬五千三百有奇悉出官帑無絲毫派及民間民間稱便於是大憲飭肅寧令尹君侃會勘知余此舉實爲數百年利涉計而非苟且塗飾博一時耳目之觀也橋之南不半里苦水舖有橋視馮家橋差小畝極將傾余捐養廉并葺治之不復上請橋成之日余具牲醴祀神於其右百姓老幼歌呼演劇驩會惟時橋

下皆陸地也越三日甘雨大沛境內外瀝水畢匯西達
道皆沒橋下河深丈餘矣脫余申憲必俟報可請帑必
俟得然後施工工將不獲施而往來病涉者雖國僑氏
之輿不勝載也余於茲役適有天幸焉邑耆生胡廷彪
揖而前曰公甫下車捐俸爲吾民建倉今兩橋繼成而
邑境之橋梁在在修整無缺壞者是不可以無記余曰
道路橋梁飭治以時守土者之責也奚敢言功且余新
莅茲土日不暇給事豈無大於茲橋者而沾沾以是示
我邑人乎生固請聊書之以紀歲月非余志也

重修獻縣學兩廡戟門櫺星門記 吳龍見

獻邑文廟在城東南隅重建於前明洪武一修於成化間再修於萬歷間我

朝雍正十一年前邑宰明君晟修大成殿建尊經閣乾隆五年楊君文彩重建崇聖祠修明倫堂規模麤具歲月滋深牆宇欹傾榱桷朽腐其間東西兩廡戟門暨櫺星門爲尤甚十一年春龍見由武調獻展謁之下踟躕不寧十二年春夏之交詢諸學博謀及紳士咸慕義樂輸用襄盛舉龍見捐一歲俸金以倡之擇工必良選材必精尅期趨事母敢或惰惟時與司諭鮑君梓交相勸勉率諸生盧正程起祚等董其成焉先修正殿上棟下

宇整飭宏麗東西廡則撤而重建之次戟門左右名宦鄉賢二祠又次櫺星門門材腐敗易以堅好東西道德坊下添建柵欄二座以衛宮牆於是未及十旬廟內外肅然惟新矣諸生請爲文以記龍見應之曰學校爲政治之本人材出焉風教繫焉敝而不修長吏之過也非有所創建而僅事繕葺奚記焉且非宰所能獨任也賴廣文先生同志閤邑紳士輩協力而共成之藐焉令長顧攘衆美而張大其辭以爲己功亦有識者之所羞稱也就學宮言之祭器未備樂器無存春秋釋奠兢兢焉隕越是懼瑚璉犧象之陳金石干羽之事相沿迄今未遑修舉又奚事大書深刻以誇廟庭觀美哉鮑君曰廟

不修則壞君繼前人而葺新之事半功倍誠不可以無
紀也廼不獲已而敘其本末誌其月日以示諸生且進
而告之曰獻本漢藩舊封詩書之澤久而未湮今

天子崇尚儒術文風士氣彬彬日上卽如今歲丁卯吾邑
登賢書者四人而紀昀乃居榜首諸生其各績學勵行
以紹鄉先達可也顧念人材蔚起所以長育而維持之
者寧非官師之責歟振興風教倡率齊民願有以易乎
俗吏之爲之也是役也經始於乾隆十二年七月十八
日落成於九月二十日凡用工料銀二百八十餘兩其
捐貲紳士姓名例得附書

吳郡學尊經閣之北有書院曰紫陽前大中丞儀封張公之所建也自康熙五十三年迄今雍正二年日久不治院宇頽圯方岳西林鄂夫子下車實理新之其成也積屋之數若干積器之數若干藏書之數若干七府一州諸生肄業於其中者幾不能容也日月程課優給廩餼且爲之延太史掌教以觀厥成經義治事有胡安定教授蕪湖之遺範焉龍見不揣固陋謹撰記以呈公曰匹夫而爲百世師豈偶然哉其人其道之潛見宇宙之所以晦明運會之所以升降生民之所以爲夢爲覺胥於是焉决之昔孟氏以距楊墨配禹韓子以闢佛老配

孟朱子以譚經論學集諸儒之大成此非人之所爲天之所設也孟距楊墨楊墨不行韓闢佛老而僅少息此如燎原之火雖見撲滅而星星餘燄猶厝積薪之下韓子固云釋老之害過於楊墨韓愈之賢不及孟子也宋儒之學周程導源張邵分派續千載不傳之緒斥二家似是之非者惟我紫陽朱夫子發明性道繼往開來殆軼韓而紹孟歟當孝宗之初立也朱子上封事至數千言大要在勤政講學絕和議雪仇耻其後歷事三朝廢召無常所傳疏劄奏對明白剴切小之如救荒恤刑規畫措置於地方之利病民生之休戚動中機宜可法可傳大之如奄豎竊權賢才廢棄兵食耗損軍國諸弊無

不激切開陳志行三代以上之事而其所爲本本原
世人以爲迂談亦庸主之所厭聞者則惟誠意正心之
說故公之忠誠能使孝宗披衣起讀而不能爲轉圜之
聽能交士大夫推轂之口而不能弭媒孽之談能信於
江海之民儀型百世而居官九考不能越四十日立朝
之安蓋君子之道大行之難如此昔人有云孔子當周
之東而欲挽之西朱子當宋之南而欲挽之北可謂窺
見聖賢心事者然宇宙之明晦運會之升降生民之爲
夢而爲覺夫豈人之所能爲也哉有明以來考亭傳註
懸布學宮士夫起家朱學輒若畫一間有爲新學者齟
齟考亭久且自知其非不敢操入室之戈以自標於門
牆之外延及

聖朝崇信表章升配十哲

御纂

朱子全書製序定例頒布天下使天下之士束髮受
書誦法朱子經義之辨析道學之昌明誠曠古所未有
也有道學斯有經濟其與夫托諸空言者不侔矣紫陽
家廟舊在新安精舍之屬閩者曰滄州曰寒泉亭曰天
光雲影而考亭書院最著其名蓋仍唐御史黃端之舊
也或曰公生於閩卒於閩講學於閩歷代祠公紫霞洲
上又祠於漳之郡庠與濂溪明道伊川稱四先生跡其
生平宦遊不識一屆吳下否吳之祀公恐非神所棲也
范見曰不然韓子廟碑云公神在天下如水在地中焘

蒿悽愴無所往而不在方今薄海內外尊奉紫陽知其
統緒之真識其津塗之正上邈伊洛以及鄒魯淵源其
若接也豈非天哉非聖人孰能當此百世之師也乎詩
固云高山仰止景行行止史遷嚮往孔門推尊至聖不
虛也後之學者文章事業求朱子以爲依歸尊所聞行
所知升堂而入室其亦有所折衷矣夫

薛帷文鈔卷十四目錄

公祭相國高安朱文端公文

祭鄉賢高君顯承文

公祭海太夫人文

先考贈戶部主事西岑府君暨先妣封安人朱太

君行畧

先室例封安人徐氏釋服奠文

薛帷文鈔卷十四

武進 吳龍見 恂士一字惺士

公祭相國高安朱文端公文

嗚呼惟公兩儀間氣一代偉人性天完粹學問深醇廬
峯挺秀錦水涵春光風霽月威鳳祥麟筮仕名城羣歌
召父郎署升階馳聲栢府服官閒暇釐正訓詁周禮儀
禮荒闕誰補繫昏與喪論議千古煌煌大章發聾開瞽
牙旗六纛玉節雙旌海不揚波兩浙風清公忠體國入
掌銓衡金鏡澄輝二曜合明參贊惟勤元揆加秩
殿閣論思

薛帷文鈔卷十四 祭文

一

帝廷輔弼師師夔龍哀和德一履高彌下心存戰栗公調
元氣秋肅春溫依我日月奠我乾坤
講筵肆啓目擊道存時承

顧問

帝胄在門惟公平生屢司文柄視學西秦京兆銜命冰
壺玉尺士林額慶載典春闈終始惟敬運際

龍飛掄才極盛惟公遭遇陶唐姚虞股肱元首聯爲一
軀啟心沃心補袞是圖海宇寧謐呼嵩歌衢遽抱沉疴
給醫賜葯

皇念彌留

親臨帷薄陳奏侃侃推肝著畧春秋防微餘忠是記

九重咨嗟百辟震愕胡不憇遣山頽木落葬祭

錫全易名無忤延及哲嗣

恩子襲爵某等蚤承風教夙奉儀型元功在野相業在

廷公胡忽逝箕尾騎星東郊執紼薤露初聽雲車風馬

髣髴斯靈跼陳牲醴眷此微馨尙饗

祭鄉賢高君顯承文

吳龍見

惟公進道若退明道若昧孝友可風純德之會孔門望
族渤海始大共城建侯尹我冠帶繫惟蘭麥辭徵奉親
公其嗣之式是邦人厥祖厥考剛正好義緯武經文

裒典咸備公之介弟禁旅統帥叔出伯處安時養志時
清道泰仕進多途符分郡竹足効馳驅公篤至性豈曰
拘迂祠建譜輯顯節扶孤統帥歸田番番二老羣從扶
攜繡祿在抱公嗣克肖

寵錫綸章文孫競爽拔幟膠庠公無疾終壽七十六音
容髣髴間井夜哭邦之士夫以誄以詩賢守銘之實允
蹈之輿論採取配食蘭祖奠牟陳牲吏主與俯某忝世

薛帷文鈔卷十四 祭文

三

好繫官

闕下念公傷懷葬不送野謹遣使某奉帛致詞拜手南
雲神其鑒茲

公祭海太夫人文

大司農海
公元配

吳龍見

嗚呼竹淚湘潭蓮枯華井易水春寒薊門煙冷金波息
照瑤草先零搖落何遽光華莫停夫人闕闕承恩簪纓
被澤七葉瑤珂一門畫戟有文在手有象應圖公宮教
業師氏傳模秋菊成銘椒花作頌秉禮于歸徽音彌重
魚軒憑軾澤澤雉文衣明月照乘僊石支機爰配君子尙
書台斗敬事舅姑承中奉帚采采芣苢萋萋葛覃秋帷
秉杼春水浴蠶壺德純深中閨齊一序戚升榮從夫加
秩大農經濟宮府攸同台階福曜識履聞風夫人相之
內政精審命歸頭行

褒封一品月華門左長信宮中

恩眷優異

在帷文鈔卷一四 祭文

四

賜賚豐隆蘭夢夙徵星郎拜

命黃閣締姻朱門通聘膝前戲綵玉友金昆尙書下直
嬾婉琴尊出入宮闈往還戚里壓線嫁姑停機訓子篤
親惟謹御下以和解衣推食里巷謳歌偕老相期百年
半度遽掩瑤華先從春露鶴從吳市鳳去秦臺靈光竅
窈燈影徘徊婺女還星姮娥歸月天上春沉人間悲發
珩璜節步藻火明儀音容宛在縹緲難追蕙幄銷紅松
門掩綠無復簫聲空餘琴曲某等分同僚友誼切寅恭
願附彤管闡揚女宗白道縈紆青山晚晚行路傷嗟母
儀未遠有牲載割有酒載斟雲旗來下鑒此微忱

先考贈戶部主事西岑府君暨先妣封安人朱太

君行畧

嗚呼痛哉先府君之棄不孝龍見也三十有三年矣而

吾母竟繼之而長逝耶其棄之蚤也是不孝輩未有一

日之養也其棄之稍遲也是吾母有可養之年而伯兄

季弟相繼天歿不孝龍見年幾強仕尙困諸生暨通籍

後浮沉戶曹者復四五年猶之乎未有一日之養也嗚

呼痛哉先是吾父見棄時京邸營殮扶輓南下一厝再

遷倉卒拮据不及營地下之石迫吾母斃斃稱未亾人

疾病纏綿又不忍傷心觸諱詢問前事皮置筆墨荏苒

迄今積戾降殃母又見背卽欲問無從矣嗚呼痛哉潛

德弗彰萬死莫贖謹迸血灑墨畧陳梗概仰冀

大君子垂察焉府君姓吳氏諱守相字爾琢別號西岑

我吳系出延陵世居宜興之北渠里六世祖寓菴公諱

性嘉靖乙未進士歷官尙寶司司丞贈少傅始占籍於

武進洗馬橋子若孫登科甲顯仕籍者凡四十餘人名

尤著者載在國史高祖從菴公諱同行贈少傅淡於利

祿隱居不仕曾祖青門公諱宗達萬歷辛丑會試中式

甲辰探花及第歷官建極殿大學士授光祿大夫贈太

傅諡文端忠貞清介勛名炳耀天壤至今爛然曾祖母

趙氏封一品夫人生曾祖母孺人奚氏王父賜贈承德

郎戶部主事檀干公諱名思字無虛幼稱神童由邑增

生廕授中書舍人

熙朝革命泰運鼎新我王父積學力行老而彌篤鄉黨中推耆儒碩德焉所著四書慎餘編五易稿閱三十年而後定及門仕宦諸前輩事業文章彬彬稱盛也王母龔安人諭德兼侍讀蘭谷公諱三益女割股療母疾心悴血暈少間泣告先王父曰吾其殆矣恐不任生育請立副室器重我生祖母陳安人而立之生四子長卽府君也府君生而王父年已四十餘矣幼而敏悟年九歲揮手文成驚老宿王父庭訓端嚴讀史窮經勗府君以行己立身之道時藝則教以闡明聖賢義蘊干祿非所務也府君謹誌之王父年且邁倦於應酬府君甫成童

接對賓客治生產業悉中條理歲凶慮王父年高失養竭蹶奉膳而吾母朱太安人于歸未期亦脫簪解珮以供晨夕甘旨惟懼不給歲癸亥府君年二十三始補博士弟子員明年食餼自是學使者校士三置冠軍試藝出紙價必貴府君欽然常自下也王父進府君而命之曰太史公徧觀天下名山大川著作迥越千古母徒抑鬱老牖下於是遊浙踰閩泛桐江探禹穴訪高人舊跡仙子遺踪憑弔英雄割據曩昔興亾所至輒與名公鉅卿酬唱贈答吟嘯酒盞間豁如也然又懼遠遊以曠子職遣歸奉養介壽高堂率子弟羅拜階下家雖貧笙歌侑酒博王父歡笑爲樂宗族皆曰是誠可謂養志者初

龔王母之喪府君甫就外傳哀毀如成人觀者歎息泣下先王父病生祖母陳安人晨夕焚香祝天願以身代未幾果病病果不起府君侍兩親疾跪進湯藥起跪進糜粥復起屏息立幃帳外呼必答日數四無倦色暮則擎燈達旦弗遑假寐陳安人歿府君病臥晝夜號慟猶強起匍匐治喪事逾年府君病始痊先王父享壽八十有二辛巳卒距龔王母之喪三十年距陳王母之喪二十有一年府君哭泣辮踊氣絕復甦三日勺水不入口吾母適產季妹哀慟幾殆舍殮棺衾俱盡禮甲申啟龔王母之兆合窆於三山刊地之原此龍見垂髫時所及見者迄今讀府君所撰先王父中翰公行畧痛念我王父一生守義不改其操坐困寒氈韜光未發淚不禁涔涔下也當是時府君屢困秋闈顯揚莫遂而無怨無尤惟自咎於業之不精學之不篤也手不停披口不絕詠遠紹六經旁搜子史下至陰陽術數之書一一窮究其說考證訛謬爲文矩矱本之先民詞華採諸經史自府君謝世後遺文幾數千首皆篤實輝光羽翼聖訓讀者謂如聆清廟明堂之奏黃鐘大呂之音也兼長於詩近體追唐軼宋古樂府得漢魏之遺作記序傳誌在廬陵睂山間學晉唐楷法各具體格一時縉紳先生爭延致家塾課子弟甚有以不列門墻爲耻者九試棘闈未售聞者莫不惋惜焉府君年四十四服闋其明年始入都

又明年丙戌

內廷教習員缺校核士子補授於是四方聞者雲集京師府君應

徵就試相國陽城田公時以待御巡視西城拔置第一冬十月

廷試已刻命題申刻掣卷寸晷之下府君立就萬言相國澤州陳公閣學華亭楊公恭擬第五卷進呈越十餘日再試拔置第三名卽日赴景山官學供職伏蒙

恩賚優渥月給俸錢歲支廩粟夏葛冬裘以至硃墨冰炭之屬所需無不備具府君手諭不孝等曰吾以諸生遭逢

明盛出入

禁庭恐勉竭駑駘未足仰答

隆恩於萬一也丁亥手諭不孝兄弟赴京侍學偉立龍

見達京邸趨詣再拜驚見府君面目黧黑形體羸瘦居

數日始知官學中訓滿洲蒙古高麗漢軍等十有六人

自發蒙而成童暨庠士應大小試者一一咸集晨入暮

出冒風雨履霜雪畧無暇日訓誨之下五官竝用時而

退食輒終夜沉思簡練揣摩操技命中又當事暨親朋

徵求詩古文詞及索書堆案盈几時散時積以故體素

豐腴而頓傷憔悴也不孝輩心竊憂之戊子秋塲事甫

畢趣赴辦職我府君精力內耗暑寒外侵遂成銅疾易

箕時無一語及家事惟慨然長吁曰

國恩未報子職未終吾不瞑目矣撒手而逝嗚呼痛哉

不孝龍見

時方寸五歲與伯氏羈棲蕭寺苦由相依潞

水燕山冰霜跋涉暨抵常之日吾母攜三歲弟

儼立郊

迎一慟欲絕自是母病日增瀕於危者數矣吾母姓朱

氏廩貢生南吉公諱有孚女南吉公爲吾郡名宿未有

子止生吾母奇愛之一見府君九歲時所爲文擊節稱

賞因許字焉年十二南吉公謝世越數年于歸爲先王

父中翰公冢婦柔和孝謹曲得歡心三十年如一日王

母龔安人早世歲時祭祀涕泣盡哀常以不及事嫡姑

爲憾陳安人又早世時遭歲凶家貧餽粥不繼吾母佐

薛惟文錄卷一四 行畧

九

府君治喪必誠必信間與不孝輩痛述彌留情事猶奠

奠然不知涕之流落也陳安人遺三叔一姑婚嫁事摒

擋區畫一一愜心雖衣釧典鬻靡所顧恤諸叔輩有終

身母事工嫂者吾母固不任受也府君自鄉徙郡城先

王父適爲通族長子姓起居族務需稟承吉凶慶弔尤

爲煩費府君旣伉爽不問有無吾母主中饋粗糲自甘

而歲時賓祭親串餽遺必求豐腆暨米鹽凌雜量入爲

出先事綜理井井不亂故家鮮恒產而終歲所需有減

損無乏絕嗚呼自中道孀居而後家徒壁立課子女畢

婚嫁持齋戒殺四十餘年罔非集蓼茹荼之日矣嗚呼

痛哉不孝兄弟無能早自豎立支撐門戶觀閱受侮貽

懼吾母者可勝道哉戊戌冬伯兄不祿已亥秋嫂繼之
戊申夏季弟又繼之嗚呼吾母疊遭慘變哀毀殊不欲
生膝下惟龍見一人多方解慰冀以寬殷憂而娛暮景

也然卒不可得故惟就近地舌耕餬口二十餘年不敢
違館違左右吾母嘗從容屈指我府君行事語不孝曰
建祠以祀文端公收贖宜典黃字號蘆灘取租供祭汝
父獨司其事今榱桷鼎新春秋胙饗是篤親之孝也北
渠義莊有墓祭無祠祭汝父力請於大父啟知通族於
大宗祠虔修歲事復請營度少傅公祠宇別搆數楹恪
遵祖訓顯有爵崇有德於長至日從祀是追遠之孝也
增定族譜義例付梓并請大父申明條約以贍通族是

收族之仁也祖母黨陳有貧不自給者周其匱乏老者
養其天年同里閭無所歸者殯其身後吾亦不惜辛勤
以成汝父志是任卹之誼也汝外家乏嗣汝父祀之數
十年旣而擇吾宗一人立爲嗣吾遂分奩田以給之使
典厥祀是繼絕之誼也嗚呼汝父一生行業施於外者
吾不具詳惟舉一二大節卓卓可紀者以語汝吾知其
將有待於汝也乙卯夏四月不孝龍見以諸生謬蒙前
撫軍高文良公暨前制府劔水趙公前學憲宗伯桐山
張公薦舉入都未廷試倖叨鄉薦丙辰成進士吾母聞
之且喜且悲曰科第汝家故物恨汝父不及見耳旋分
戶部學習以黥司兼攝閩司智短事繁勉供職己未

五月部堂大人出具行走勤慎諳練部務考語保奏留部奉

命留部授額外主事

龍見疊荷

隆恩涓埃未報何敢言歸顧念吾母春秋高病久艱於跋涉未能迎養尋以八月引疾暫假兼程歸省見吾母眠食尙無恙而齒髮已就衰於是不孝違色養者五年於茲矣殊不願入都銷假遂巡需滯展限數月至庚申五月北行舟泊津門始知以呈誤經吏部議降調本部各堂大人定有奏留稿已畫齊會有齟齬未果上而不孝因降補需次決計南旋臘月抵家則吾母形神消滅舊病轉增迥非初夏景象矣今年三月伯姊病歿四月室例封安人馳封未受徐氏病又歿吾母愛媳也與女同而吾母之慟媳更甚於女故自夏徂秋黯然神傷恒伏枕悲泣而病勢愈危醫不能止至十月上旬呼不孝龍見曰吾病亟矣欲一見次孫媳可乎次孫媳者金臺符氏不孝爲猷兒擇配者也不得已囑媒氏往請符親家慨許遂不擇期於望後之一日至吾母執其手曰吾病益亟矣得見汝死不恨噫汝姑亾遺幼男弱女累汝矣預示化期屆期呼不孝龍見跪牀下命之曰汝受

國重恩補官後尤宜盡心竭力報効

朝廷以成汝父之志言訖亟命扶起端坐合掌誦佛號至午刻遂瞑嗚呼痛哉吾母恭儉慈仁終身不苟訾笑

不孝兄弟失怙早以母兼師教督不少寬貸率諸女紡績勤十指寒暑罔間下逮臧獲撫之如兒女靡不感恩晚年抱病游心禪悅精通內典諸姊妹歸寧每與講說楞嚴般若經義及淨土法門要旨臺臺不倦於先王父批纂禪家六籍暨龔王母手錄經典尤寶貴焉屬續之頃神清氣定治命凜然雖學佛人罕能逮是嗚呼不孝龍見方期來歲仲春吾母稱八十觴起受子孫羅拜親朋咸集綵服承歡當如府君壽先王父時孰意相距不過十旬而天奪之速竟溘然長逝耶嗚呼痛哉不孝旣蚤歲喪父撫拾舊聞罅漏是懼又荒眩哀迷不克彷彿吾母懿美之一二以視伯兄季弟雖生猶死也尙復腆

薛帷文鈔卷四行畧

三

顏視息罪誠無禱於天矣先府君生於順治辛丑閏七月初一日未時卒於康熙戊子九月十三日丑時由郡廩生應康熙丙戌

廷試

欽取內廷教習候選知縣享年四十有八先母生康熙癸卯二月初八日寅時卒乾隆辛酉十月二十日午時享年七十有九不孝龍見伏遇

覃恩先府君贈承德郎戶部貴州清吏司主事先母封

安人俟卜日合葬於延政鄉查墟萬壽庵前新阡子三

人長偉立

郡庠生娶白氏萬歷丙午舉人雲南廣南府

知府雉衡公紹光曾孫正則公蒿仲女俱先卒次

龍見

邑增生薦舉博學鴻詞中雍正乙卯科順天鄉試舉人
乾隆元年丙辰科會試中式

殿試第二甲進士

特授戶部貴州清吏司主事

覃恩貶贈王父中翰公未受封娶徐氏中憲大夫西城
兵馬司正指揮羹梅公鼎原女孫太學生心翼公正儀
長女

覃恩貶贈王母龔安人陳安人亦未受封先卒次嚴立

先卒聘周氏修職郎河南滎陽縣縣丞文邑公在豐女
孫太學生斯立公祖望女守節女六人一適宜興太學
生候選州同知嘉貽邵公祇植第二子滋蕙一適順治

薛帷文鈔卷四 行畧

三

乙酉舉人湖廣石門縣知縣卓人毛公重倬孫太學生

元方公第三子永治一適郡廩生德求鄭公祖期

長子太學生嵩高一適廩貢生候選儒學教諭齊先楊

公正修第三子貽棻一適江陰太學生候選州同知虞

陶繆公民埴長子郡庠生之鈞守節一適太學生秋遠

龔公盛時第三子太學生純俱吾母太安人出孫男六

人偉立出者三端獻端敬俱殤端輔娶周氏太學生彥

升永思女龍見出者三端欽監生娶符氏太學生攻玉

廷英季女端采監生出嗣嚴立聘張氏歲貢生元功伊

長女端彝未聘孫女二偉立出者一適丹陽邑庠生紫

直蔣公理正孫襄城宁子袁龍見出者一適泰州康熙

庚戌會元歷任福建巡撫定山宮公夢仁曾孫工部都
水司主事永椿公壽平孫太學生候選州同知龔齊治
駿第三子廩膳生 桂脩 曾孫男四人 通大友大端輔出
詒大瀛大端猷 出幼未聘嗚呼不孝 龍見 致身遲暮奉
養愆違抱恨終天形影相弔寸衷碎裂言語失倫仰祈
大人先生俯賜採擇錫之鴻章俾吾父吾母永有聞於
後世雖死之日猶生之年也不孝等世世子孫感且不
朽不孝孤哀子吳龍見泣血稽顙謹述

賜進士狀元及第

日講起居注官翰林院修撰年眷姪金德瑛頓首拜填

諱

亾室例封安人徐氏釋服奠文

吳龍見

嗚呼汝之逝也蓋二十有七月矣自殯而小祥而暫厝而大祥余未有一言非余能忘情也憶初沒時拮据含殮慘甚不忍言未幾而吾母病篤又未幾而棄養苦塊餘生方寸俱亂不暇言且不能言今兒女輩禫而釋服矣此而不言更無時言矣嗚呼余豈真忘情哉汝之于歸也不及事吾父與吾母終始相依爲命者二十有五
年汝性柔謹事吾母先意承志從無違言無忤色余諸生時嘗館澄江陽羨間非歲時伏臘不得歸汝奉晨昏供甘旨二十年來實代子職暨余走京師學習戶曹者四年祿薄歲歉收嫁時簪珥衣裘典鬻殆盡支撐門戶

薛帷文鈔卷四奠文

五

病入膏肓常不使吾母知之乃逝不數月而夜臺接待當不異平生也余孤介不能諧俗過則微規之善則贊成之蓋妻也而友矣臧獲少且劣作苦執勞汝實先之凡祭品之潔賓饌之具必汝所躬親者也不獨友也蓋兼作僕婢矣余南闈七試不第汝當面言笑自如而背則涕泗交頤矣至卯辰倖捷汝雖暫爲開顏而家徒壁立報錄者苛責甚於索逋非又汝攢眉困心時歎吾母視汝猶女子汝亦事之如母而妯娌則有難處者吾嫂自以心疾死遺孤甫二歲汝撫之如己出嗣因兩姪繼天姑息失教時崛強拂汝意汝體吾母意含忍之卒爲擇配完聚兄嫂今得兩孫矣弟聘室周末婚奔喪性行

頗不似汝失吾母歡汝婉轉勸導同爨十餘年絕不聞
詬誶聲汝初生一女一男俱殤繼得猷兒余曰汝事姑
孝他日必得賢媳事汝汝謝不敢當且以己之多病也
曰妾命薄除是死後可余始以汝言爲不祥乃今果驗
耶汝媳符氏奉吾母彌留命來吾家果賢余今抱孫焉
采兒彛兒俱長成就家塾督課學業稍進女擇海陵宮
氏婿余勉具奩資行遣嫁矣汝其知之乎否乎余曩遇
覃恩應得封典馳贈兩祖妣汝心甚愜明年余服闋補
官尙載邀

寵錫必及汝汝其安意俟之汝父母雖老眠食尙無恙
余力能報効當體汝志行之母以不及送終爲憾嗚呼

汝之生也以媳則孝以妻則順以母則慈以妯娌則和
其德修於己者可謂無憾而何歷年之不永也噫余知
之矣余實德薄運蹇有以致之矣求一日之再覩儀容
再聞警咳而不能矣抑迴想三年中夢寐遭逢若哀若
訴迷離之境亦不可多得矣雖然余也年近知非精力
漸耗自今以往宦海浮沉稅駕何所鹿門之隱莫偕菟
裘之營何日生而獨也何如死而偶乎且余嘗語汝人
生難料尙余溘焉朝露將若之何汝愀然曰寧死君手
不願稱未亾人言猶在耳今汝果考終於余手矣命之
修短余不敢知而情不能忘異日者諒當齎笑相攜於

同穴也



